

## АВГУСТА В 29-й ДЕНЬ

ПРОИСХОЖДЕНИЕ ЧЕСТНЫХ ДРЕВ ЧЕСТНАГО И ЖИВОТВОРЯЩЕГО КРЕСТА И ПАМЯТЬ  
СВЯТЫХ СЕДМИ МУЧЕНИК МАККАВЕЙ, И МАТЕРЕ ИХ СОЛОМОНИИ, И УЧИТЕЛЯ ИХ  
ЕЛЕАЗАРА

### ВЕЧЕР

Обычная кафизма. На Господи, воззвах: стихиры на 6. Креста 3, глас 4.

Подобен: Званный свыше:

Днесь радуется верных множество Божественное: \* является бо Небесный Крест  
концем, \* осиявает твердь Светом неприступным, \* воздух озаряет \* и земли лице  
украшает. \* Поет Божественными песньми Церковь Христова, \* служит, почитаючи  
\* свыше ю соблюдающий Крест Божественный и пречудный. \* Егоже силою  
укрепляеми, \* Владыце приступим, зовуще: \* умири мир и просвети души наша.

Да радуется тварь и играет: \* днесь бо облиста Крест в концех с Небесе, \* земная  
просвещая, \* и совокуплены показа расточения. \* Днесь ликуют с лики ангельскими  
человецы, \* ибо бранящее средоградие, Крестом разорено, \* во едино вся яве  
совокупи. \* Тем, предсияя паче солнца, \* всю тварь просвещает благодатию, \* и  
уясняет, и спасает \* верно того чтущия.

Паче солнечныя зари \* хотяй мирови, якоже скиптр честный, \* Царя Христа и  
кончину показати, \* Крест Божественный се предсияет ясно в концех. \* Сей возведе  
из ада род человек, \* ада вельми пленив, врага низложив, \* демонов гордыню до  
конца погуби. \* Ныне же проявляет воскресение Спасово \* и спасает зовущия: \*  
умири мир и просвети души наша.

И святых 3, глас 1.

Подобен: Всехвальнии мученицы:

Закона верх, седмию столпы возвышен, \* мучительство не поколеба, \* ибо  
скотский гонителя гнев мужески претерпеша, \* тело предавше секущим, \*  
благороднии юноши и братия, \* Моисейским преданием хранителие.

Паче зримых ум воистинну возвысивше, \* уды плотския отсецаху \*  
благочестивии и доблии отроцы \* с материю Богомудрою, \* великими надеждами  
вжиляеми, \* яже ныне получивша, \* у Авраама почивше на лонех, праотца своего.

Душевною доблестию твердо себе вооруживше \* и ярость яко преобидевше, \*  
противу борцу крепко прилежаху \* благочестия ради \* и закона отеческаго  
хранением \* священнейшии Елеазар и премудрии юноши \* с материю Богомудрою.

Слава, глас 8. Иоанна монаха:

Святии Маккавей мучителю глаголаху: \* нам, о Антиоше, един Царь Бог, от  
Негоже быхом \* и к Нему обращаемся. \* Мир ждет ин нас, \* видимаго высочайший  
и твердейший, \* отечество же нам – Иерусалим крепкий и негибнувший, \* торжество  
же – еже со Ангелы житие. \* Господи, молитвами их помилуй и спаси нас.

И ныне, глас тойже. Иоанна монаха:

Егоже древле Моисей прообразив собою, \* Амалика низложив, победи, \* и  
Давид песнопевец \* подножию Твоему, вопия, кланяться повелеваше, \* Честному  
Кресту Твоему, Христе Боже, \* днесь, грешнии, кланяемся, \* устнами недостойными

\* Тя, изволившаго пригвоздится на нем, воспевающе, молимся: \* Господи, с разбойником Царствия Твоего сподоби нас.

**На стиховне Октоиха.**

**Слава, глас 8. Космы монаха:**

Души праведных в руке Господни, \* якоже Авраама, и Исаака, и Иакова, \* иже прежде закона праотцы и Маккавеев прадеди, \* ныне восхваляемых от нас: \* сии бо крепкодушнии Авраамстии внуцы суще, \* вере поревновавше своего праотца Авраама, \* и даже до смерти подвизашася за благочестие. \* Благочестно бо воспитавшеся \* и законно пострадавше, \* нечестие обличивша гордаго Антиоха \* и, ничтоже предпочетше временныя жизни, \* вечныя ради вся Богу возложиша: \* душу, мужество, разум, \* тело мягкое и воздаяния чистоты воспитанием. \* О, корене благочестива, \* из негоже вы прозябосте, Маккавеи! \* О, матере святыя, \* рождшия равночисленное седмерицы число! \* Но молим вас, Маккавеи, \* с материю вашею Соломониею \* и мудрым священником Елеазаром, \* егда предстоите Христу Богу, \* Егоже ради потрудитесь, \* труды плодов ваших прияти от Него, \* прилежну мольбу сотворите о человечестве: \* творит бо, елико хочет, \* и исполнит хотения ваша, боящихся Его.

**И ныне, глас тойже:**

Глас пророка Твоего Моисея, Боже, \* исполнися, глаголяй: \* узрите живот ваш, висящ пред очесы вашими. \* Днесь Крест воздвигается, \* и мир от лести освобождается; \* днесь Христово воскресение обновляется, \* и концы земли радуются, \* в кимвалех давидски песнь Тебе приносяще и глаголюще: \* соделал еси спасение посреде земли, Боже, \* Крест и воскресение, \* ихже ради нас спасл еси, Блаже и Человеколюбче, \* Всесильне Господи, слава Тебе.

**Тропарь, глас 1:**

Болезньми святых, имиже о Тебе пострадаша, \* умолен буди, Господи, \* и вся наша болезни исцели, \* Человеколюбче, молимся.

**Слава, И ныне, глас тойже:**

Спаси, Господи, люди Твоя \* и благослови достояние Твое, \* победы на сопротивныя даруя \* и Твое сохрания Крестом Твоим жительство.

\* \* \*

Известно же да бывает: Яко прежде клепания входит иерей в сосудохранильницу и полагает Честный Крест на жертвеннице. И по отпущении вечерни иерей и диакон облекутся в ризы. И диакон покадит Честный Крест и речет: Благослови, владыко. Иерей: Благословен Бог наш: Таже, Трисвятое. По Отче наш: тропарь Креста. Слава, и ныне: кондак. И взимает иерей Крест с блюдом на главу и вносит в олтарь, предыдут пред ним со двема лампадами. И полагает Крест на трапезе, на Евангельском месте, а Евангелие на Горнее место. И возжгут пред ним свещу на всю ночь.

## НА УТРЕНИ

На Бог Господь: тропарь Креста, глас 1:

Спаси, Господи, люди Твоя \* и благослови достояние Твое, \* победы на сопротивных даруя \* и Твое сохраняя Крестом Твоим жительство. [Дважды]

Слава: мучеников, глас 1:

Болезнями святых, имиже о Тебе пострадаша, \* умолен буди, Господи, \* и вся наша болезни исцели, \* Человеколюбче, молимся.

И ныне: Креста.

И обычные кафизмы, и седальны Октоиха. И чтение. Канон Октоиха един на 4 и канон Креста на 6, глас 6, и мучеников на 4, глас 8. Аще ли случится праздник сей в субботу и аще храм Христов или Богородицы, и поем канон храма со ирмосом на 4, и Креста на 6, и святых на 4. Катавасия: Крест начертав:

Канон Креста, егоже краегранесие: Кресту покланяюся, верных спасению. Глас 6.

Песнь 1

**Ирмос:** Яко по суху, пешествовав Израиль \* по бездне стопами, \* гонителя фараона \* видя потопляема, \* Богу победную песнь поим, вопияше.

Кресту, верных спасению, покланяюся, и тепле облобызаю, и, объемя, вопию: Древо всеблаженное Христово, душу мою и ум просвети, молюся.

Победоносно явися на страсти и бесы днесь знамение Креста. Темже, вернии вси, светло просвещше души, ныне облобызаем.

Лучезарная облистает сияния Крест Честный и просвещает верно покланяющиеся ему днесь, освящая души наша и телеса.

Жизнодательный Крест предлежащ и зримь световидную зарю препосылает благодатей: приступим и примем просвещение, веселие, и спасение, и оставление, хваление Господеви приносяще.

Богородичен: Пресвятая Дево, Яже Христа плотию рождши, пострадавшего нас ради волею на Кресте, Тя блажащия честно спасай мольбами Твоими.

Ин канон мучеников на 4, глас 8.

Песнь 1

**Ирмос:** Воду прошед, яко сушу, \* и египетскаго зла избежав, \* израильтянин вопияше: \* Избавителю и Богу нашему поим.

Лик седмочисленных страдалец, явлься единым нравом в лютых, по утверждению отеческаго закона, умерети не отрекошася.

Славу презревше, яже на земли, желанием Божественнаго Царствия, всяку болезнь претерпеша Божественнии Маккавеи, темже достойно ныне чтутся.

Закона хранителие Моисеева, воистинну доблии Маккавеи, братия друг со другом явишася, вегда попати им Антиохово безбожие.

Богородичен: Чини Тя Ангел и человек, Безвестная Мати, восхваляют непрестанно: Зиждителя бо всех, яко Младенца, на руку Твоею понесла еси.

Катавасия: Крест начертав, Моисей \* впрямо жезлом Черное пресече \* Израилью пешеходящу; \* тоже обратно фараоновым колесницам, \* ударив, совокупи, \* вопреки написав непобедимое оружие. \* Тем Христу поим, Богу нашему, яко прославися.

### Песнь 3

**Ирмос:** Несть свят, \* якоже Ты, Господи Боже мой, \* вознесый рог верных Твоих, Блаже, \* и утвердивый нас на камени \* исповедания Твоего.

Оружие древле жизни блаженное древо даровася хранити за преслушание првотданнаго Адама, Крест же сему путь сотвори.

Очима, устнами и душами, лица и сердца поклонимся вси Пресвятому Кресту Жизнодавца Христа, имже мир весь освящается.

Храмы Богу пророчески днесь бывше, покланяющесе древу Пресвятаго Креста, и наследницы Его, со страхом вси того целуем.

Песнословим тя, Кресте, верою молящихся силе твоей: изми нас сетей вражиих и управи нас к пристанищу всех спасения, поющих тя.

**Богородичен:** Девою родила еси Сына, прежде Тебе рожденнаго от Отца прежде век, без матере от Бога, распятаго плотию, да спасет прежде согрешшия.

### Ин

**Ирмос:** Небеснаго круга Верхотворче, Господи, \* и Церкви Зиждителю, \* Ты мене утверди в любви Твоей, \* желаний краю, верных утверждение, \* Едине Человеколюбче.

По отеческим ходяще исправлением законным, блаженнии Христовы страдальцы, жизнь нестареемую вашими стяжасте кровьми, прехвальнии.

Ни огонь, ни меч превратити когда возможе доблесть нрава, блаженнии, вашу, яже в вере, в нейже упраздните мучителей шатания.

Муки претерпеша за Христа Бога прехвальнии мученицы и свыше прияша победы почести, непрестанно молящесе спасти души наша.

**Богородичен:** Девою родила еси, Неискусобрачная, и Девою пребыла еси Мати Безвестная, Богородице Марие, Христа Бога нашего моли спаситися нам.

**Катавасия:** Жезл во образ тайны приемлется, \* прозябением бо предразсуждает священника, \* неплодящей же прежде Церкви \* ныне процвете древо Креста \* в державу и утверждение.

Кондак святых, глас 2.

Подобен: Вышних ища:

Премудрости Божия столпи седмочисленнии \* и Божественнаго Света светильницы седмосвещнии, \* Маккавеи всемудрии, \* прежде мучеников превелии мученицы, \* с нимже всех Богу молитесь \* спаситися почитающим вас.

**Икос:** Хвали тепле, Сионе, Бога твоего, яко укрепил ест сей верей врат твоих и сыны твоя благослови. Сии бо, яко воинство непобедимое, ополчение воистинну доблественно и крепкомудренно, противу коварством злочестивых богомудренно сташа, вкупе победы венцы Небеснаго Сиона приемлют и Божественному престолу предстоят, о всех непрестанно молящесе. Просите спаситися поющим вас.

Седален святых, глас 8.

Подобен: Премудрости:

Благочестно наказавшесе, отроцы мудрии, мученически, \* мучителей прещения мужески посрамисте, \* яко закона поборницы и отцу послушницы бысте, святии, \* с материю Богомудрою усердно пострадасте. \* Темже и смертию живот искупыше воистинну Небесный, \* вечно радуется, Маккавеи крепкодушнии, \* молитесь Христа Бога согрешений оставление даровати \* чтущим любовию святую память вашу.

### Слава, и ныне, Креста, глас 6:

**К**рест Твой, Господи, освятися, \* в нем бо бывають исцеления немощным во гресех, \* егоже ради припадаем Ти, помилуй нас.

#### Песнь 4

**Ирмос:** Христос моя сила, \* Бог и Господь, \* честная Церковь \* боголепно поет, взывающи, \* от смысла чиста, о Господе празднующи.

**Д**а кропит вся земля радование, да веселятся древа дубравная, днесь обожена Всечестным Крестом, сияючи концем.

**П**оказавый орган умерщвления, живоносно мирови, победотворное оружие непобедимое, преславный Кресте, сердца наша просвети.

**Т**ы Божественная победа, ты соделование нашего спасения, ты верным соодоление и Божественная жертва, о Всечестный Кресте, поющия тя освати.

**Н**ебо всей земли свеселится, страстотерпцы, мученицы, апостоли, души праведных радостно ныне радуются, и вся спасает зримо подлежащее посреде жизнедательное Древо, и верныя освящает благодатию.

**Богородичен:** Воистинну Ты явилася еси, воистинну родила еси Сына Вышняго, на Кресте руце простершаго, Дево Мати Марие, и мир призвавшаго.

#### Ин

**Ирмос:** Из горы приосененная, Слове, пророк, \* единыя Богородицы, \* хотяща воплотитися боговидно усмотри \* и со страхом славословяше силу Твою.

**З**акон, блаженнии, написавше, якоже древле Моисей, во своих скрижалех помысла не преступисте сего даже до смерти, но твердо подвизастесь.

**З**аконныя Богу приносяще жертвы и моисейскому ревнующе житию, преобидеша всяко законоположение мучительское, страстотерпцы Христовы.

**Я**коже камень волненное стояние, сице многи муки, страдальцы, мужеским умом, Маккавеи, даже до смерти претерпесте.

**Троицен:** Безначальная Троице, Единице покланяемая, сопрестольная Единице, Троице воспеваемая, мученик мольбами избави нас от бед и напастей, воспевающих Тя.

**Богородичен:** Радуйся от нас, Святая Богородице. Радуйся, радость рождающая мирови. Радуйся, едина заступление человеком, благословенная Богородице Чистая.

**Катавасия:** Услышах, Господи, \* смотрения Твоего таинство, \* разумех дела Твоя \* и прославих Твое Божество.

#### Песнь 5

**Ирмос:** Божиим светом Твоим, Блаже, \* утренюющих Ти души любовию озари, молюся, \* Тя ведети, Слове Божий, \* истиннаго Бога, \* от мрака греховнаго взывающа.

**П**одыдем с радостию преблаженный Крест, в церквах и градах сей предложенный, и поклонимся, да долгов примем оставление.

**У**мерщвляется змий лукавый ныне, иже тьмы начальник, сияния не терпя, еже облистает Живоносный Крест, Божественнаго Царя скиптро честное.

**Я**ко пресветла звезда и яко бисер благолепен и пресиянное солнце, вся озаряет земли концы Крест Господень, егоже облобызаем.

**В**оскликните, языцы, воспойте, играйте, колена, и пойте Богу, давшему Креста нерушимое утверждение, еже ныне предлежит; вси вернии, радуемся, яко того ради благая приемлюще.

**Богородичен:** Спасению Тя начало, вси вернии, ведуще, ублажаем, Чистая: Ты бо прежде Сущаго плотию родила еси, хотением Своим пригвожденна на Кресте.

**Ин**

**Ирмос:** От ноци неведения \* Боговедением просветивый концы, \* просвети мя утром человеколюбия Твоего, Господи.

**Я**коже отеческий закон не разорших, святии мученицы, венцы праведными Христос вас Сам венча.

**Е**леазару равностатни в разуме явльшися, блаженнии дети, и принесостесь со онем Христу, духовное всеожжение.

**И**же святыми свободяяй от лести всяческая, спаси нас, Господи, тех молитвами, яко Благоутробен.

**Богородичен:** Херувимов явльшися честнейши, Дево Всепетая, молися Сыну Твоему спасти души поющих Тя.

**Катавасия:** О треблаженное Древо, \* на немже распяся Христос, Царь и Господь! \* имже паде дровом прельстивый, \* Тобою прельстився, \* Богу пригвоздившюся плотию \* подающему мир душам нашим.

**Песнь 6**

**Ирмос:** Житейское море, \* воздвигаемое зря напастей бурей, \* к тихому пристанищу Твоему притек, вопию Ти: \*возведи от тли живот мой, \* Многомилостиве.

**Я**ко Божествен сосуд, яко светильник светел, в церквах днесь, и в храмах, и градах Крест предлежащ видяще, и Уяснившаго сего воспоем.

**У**мерщвляется смерть, и уморяется тление, и бесовстии полцы отбегают, победный и страшный днесь предлежащ видяще Крест Христов, не смеюще прикоснуться ему.

**В**оспевающе Тя, Бога, и Царя, и Господа, яко даровал еси нам Крест стену нерушимую, егоже ныне облобызаем радостию и лютых отбегаем.

**Богородичен:** Ядом змииным прабаба пищею, яже во Едеме, помазася, Дева же, рождши Начальника жизни, источи миру нетление и воскресение.

**Ин**

**Ирмос:** Ризу мне подаждь светлу, \* одеяйся светом, яко ризою, \* Многомилостиве Христе Боже наш.

**Р**изою себе мученическою одеявше, святии, сию труды страдания вашего испестристе.

**Ж**елающе быти со Христом, всеславнии мученицы, течение страдания неуклонным помыслом преидосте.

**З**акон, иже предаде Моисей, храняще, святии, законно пострадаша, посрамльше Антиоха мучителя.

**Богородичен:** Еди́на словом плотию́ Слова рожда́я, избави, молимся, от сетей врага души наша.

**Катавасия:** Воднаго зверя во утробе \* длани Иона крестовидно распростер, \* спасительную страсть проображаше яве, \* тем, тридневен изшед, \* премирное Воскресение прописаше \* плотию пригвожденнаго Христа Бога \* и тридневным Воскресением мир просвещшаго.

**Кондак, глас 4. Подобен:**

**Вознесыйся** на Крест волею, \* тезоименитому Твоему новому жительству \* щедроты Твоя даруй, Христе Боже, \* возвесели нас силою Твоею, \* победы дая нам на супостаты, \* пособие имущим Твое оружие мира \* непобедимую победу.

**Икос:** Иже до третияго Небесе восхищен бысть в рай, и глаголы слышав неизреченныя и Божественныя, ихже не леть языки человеческими глаголати, что галатом пишет, яко рачителие писаний прочтосте и познасте: мне, глаголет, хвалитися да не будет, токмо во едином Кресте Господни, на немже страдав, уби страсти. Того убо и мы известно да держим, Крест Господень, хвалу вси: есть бо нам спасительное сие Древо оружие, мира непобедимая победа.

**Песнь 7**

**Ирмос:** Росодательну убо пещь \* содела Ангел \* преподобным отроком, \* халдеи же опаляющее \* веление Божие мучителя увеща вопити: \* благословен еси, Боже отец наших.

**Спасительному** древу поклонимся, Кресту пресвятому, емуже служат Ангельская вся воинства, предлежащ видяще, вернии, источающ нам освящение и жизнь.

**Победоносный** явися пресвятыи Крест Животодавца Христа, свыше же бесом всем множество отгона, варварское шатание, и победителя являя воинство наше.

**Яко** одушевленну, тебе, припадая, взываю: Кресте мой пресвятыи, ты ми просвети душу, и ум, и слух, и устне, и язык, и дыхание, и очи к путем Царства Христова.

**Поем,** славим, и покланяемся, и величаем Твою, Христе, державу, яко подаде нам, рабом Твоим, Крест Божественный, сладость неисчерпаемую и хранилище душам и телом нашим.

**Богородичен:** Юноши три пещь не опали, Рождество прообразующи Твое, ибо Божественный огонь Тя не опали, вселився в Тя и вся научив пети: благословен Бог отец наших.

**Ин**

**Ирмос:** В начале землю основавый \* и Небеса словом утвердивый, \* благословен еси во веки, Господи, Боже отец наших.

**Мученическими** пострадавшие болезнями, мучительских не устрашится прещений, Христу вопиюще: благословен Бог отец наших.

**Терпения** пождавшие болезней, вражия лютая победисте коварства, Христу вопиюще: благословен Бог отец наших.

**Богородичен:** Иже во утробу Девыя вселивыйся и Тоя ради Адама обновль, благословен Бог отец наших.

**Катавасия:** Безумное веление \* мучителя злочестиваго люди поколеба, \* дышущее прещение и злохуление богомерзкое, \* обаче три отроки не устраши ярость зверская, \* ни огонь снедаяй, \* но, противодышущу росоносному Духу, \* со огнем суще, пояху: \* препетый отцев и нас Боже, благословен еси.

### Песнь 8

**Ирмос:** Ужаснися, бойся, Небо, \* и да подвижатся основания земли: \* се бо в мертвещех вменяется в Вышних Живый \* и во гроб мал странноприимлется. \* Егоже, отроцы, благословите, \* священницы, воспойте, \* людие, превозносите во вся веки.

Твой Крест прообразуя Иаков иногда, на внуки положь длани пременно и благословив их, благодати во языцех научая: отроцы, благословите, священнии, пойте, людие, превозносите Его во веки.

О, неизреченнаго Твоего, Христе, снития и неизглаголаннх благих! Воплотися и, распят быв, смерть прием, и решиши человеки от клятвы, источив нетление на треблаженнем Древе, препрославленный Крест сей во веки.

Пресвятый Крест, Божественную победу, жизни начальника, лести потребителя, днесь похвалим Крест всесвятый Господень, бесов губителя и варваров прогонителя, верных победотворца и покровителя.

**Богородичен:** Гвоздьми пригвождена Христа, копием прободена в нетленная ребра, тростием в главу биема, желчь вкушающа, зрящи, Дева вопияше: где Твоя доброта зайде, прекрасное Слово, Препрославленне паче сынов человеческих?

### Ин

**Ирмос:** Безначальнаго Царя славы, \* Егоже трепещут Небесныя силы, \* пойте, священницы, \* людие, превозносите во вся веки.

Истины рачителие и закона известнии хранителие бывше, прехвальнии мученицы, поете Христа во веки.

Седморасленный плод святаго корене яко воистинну, семь Маккавеи, мученики Господни, почтим достойно.

Закону ревнители, единокорныя страдальцы, вернии, семь Маккавеи с рождшено их почтим достойно.

**Троицен:** Троице Неразделимая, Единице, в Божестве славлю Едину и в триех пою Тя лицех, Едину силу.

**Богородичен:** В последняя нас ради от Девы воплощеннаго Бога, священницы, пойте и превозносите Его во веки.

**Катавасия:** Благословите, отроцы, \* Троицы равночисленнии, \* Содетеля Отца Бога, \* пойте снишедшее Слово \* и огонь в росу претворшее \* и превозносите всем жизнь подавающаго \* Духа Всесвятаго во веки.

### Песнь 9

**Ирмос:** Бога \* человеком невозможно видети, \* на Негоже не смеют чини Ангельстии взирати; \* Тобою бо, Всечистая, явися человеком \* Слово воплощенно, \* Егоже величающе, \* с Небесными вои Тя ублажаем.

**Т**ленни от преслушания быхом, Божия заповеди преступницы явльшися: сего ради смерть прииде человеком. Темже безсмертия процвете днесь победный Крест Христов, егоже целуем.

**С**е Древо пресвятое крепкая надежда верным явися, клятвы избавление, человеком радость предлежит, обличая тьмы начальника, сему поклонимся, вернии, с веселием.

**Н**ачало благословения, и утверждение христиан, и стена, и твердое заступление, и клятвы избавление явися нам Древо вожденное, оружие непобедимое, просвети и освяти нас, покланяющихся тебе.

**Богородичен:** Храме и двере освящения, Престоле Божий, облаче и свещнице всесветлый и ковчеже благодати, Всенепорочная, честне покланяющихся образу честному Единороднаго Твоего Сына покрый и сохрани.

**Ин**

**Ирмос:** Величаем Тя, Матерь Божию, \* и славим Тя, Богородице Дево, \* яко Спаса рождающую душ наших.

**С**окровище Божественных дарований воистинну показастся, богатство неотъемлемое, всехвальнии мученицы.

**М**олитвенницы доблии к Зиждителю всех суще, испросите невлаемую жизнь душам нашим.

**И**же Божественною ревностию и теплотою души творящая вашу память сохраните неснедаемы от лукаваго.

**Троицен:** С Сыном Отцу и Духу правому поклонимся, со Ангелы зовуще: слава в Вышних Богу.

**Богородичен:** Радуйся, двере святая, Богу отверстая, единому Премудрому, Юже осени Дух Пресвятый.

**Катавасия:** Таин еси, Богородице, рай, \* невозделанно возрадивший Христа, \* Имже Крестное Живоносное на земли насадися Древо; \* тем, ныне возносиму, \* покланяющеся ему, Тя величаем.

**Светилен Октоиха. Слава, мучеников:**

**Ч**удныя воспоем Маккавей, Елиазара, отроки и Соломонию: \* сии бо низложиша шатания началозлобнаго змия \* и, закона служителие бывше, венчашася.

**И ныне, Креста:**

**К**рест – хранитель всея вселенныя, \* Крест – красота Церкви, \* Крест – наша держава, \* Крест – верных утверждение, \* Крест – Ангелов слава и демонов язва.

**На хвалитех стихиры на 6, Креста 3, глас 1.**

**Подобен: Небесных чинов:**

**Н**ебесная шествия \* Крест Честный готовит всем, \* тому покланяющимся верою несумненною, \* и ликом невестественных сил \* Иже на нем Пригвоздивыйся \* сочетает любовию поющия того.

**К**ланяющеся верою Кресту Честному, \* на нем распеншагося воспоем Владыку, \* Того мановением, \* устне вкупе и душу очищающе, \* и сиянии сего мысленными уяснимся, \* хваляще его.

Горесть древле услаждая, Моисей \* избави Израиля, \* образ Креста написуя, \* мы же сего, вси вернии, \* тайно и Божественно воображающе в сердцах наших, \* всегда спасаемся державою его.

**И святых 3, самогласны, глас тойже:**

**Многострадальная Мати,** \* к подвигом созвавши своя дети, глаголаше: \* авраамстей седине последуйте, \* да заколению Исаакову причаститесь. \* Тии же приимаху наставляющую, \* предпостизаху учащую, \* друг по друзе томления муки видяще, \* ихже молитвами, Боже, помилуй нас.

**Глас 4: Седьмь столпи избранныи** \* от единого камене словеснаго усечени быша, \* непоколебим показаша закона столп. \* Темже благоволи, Спасе, \* в мире сохранитися душам нашим.

**Глас 5: Иже закона хранителие** \* и Соломонии сынове, \* на судищи страждуще, ко Антиоху вопияху: \* мы, Антиоше, за отеческий закон тершим. \* Не отлучит же нас ни огонь, ни меч, ни зверие, ни раны, \* но вкупе умрем с материю старицею \* и учителем отцем, \* живуще и срадующеся в некончаемыя веки.

**Слава, глас 4:**

**На Маккавееи собравшуюся рать,** \* приидите, узрим, вернии, мужество: \* мучитель бо царь, вся языки удержав, \* держим беяше от старца и детей седьми \* и единыя жены. \* Темже молитвами их, Боже, \* помилуй нас.

**И ныне, Креста, глас тойже:**

**Пособивый, Господи, кроткому Давиду** покорити иноплеменника, \* верному нашему воинству споборствуй \* и оружием Креста низложи враги наша. \* Покажи, Благоутробне, на нас древняя милости Твоя, \* и да разумеют воистинну, яко Ты еси Бог, \* и, на Тя надеющийся, побеждаем, \* молящихся обычно Пречистой Твоей Матери \* дароватися нам велией милости.

**Славословие великое, тихо, со гласом.**

Иерею же оболчену сущу во всю одежду священническую, приходит с кадилом к святей трапезе, предходящу ему диакону с лампадою, и кадит святую трапезу и Честный Крест, и тако взимает Честный Крест с блюдом на главу, и исходит северными дверьми из олтаря, предъидущим ему со двема лампадами и с кадилом; приходит же прямо царских дверей и стоит, ожидая конца трисвятаго. Кончаваему же трисвятому, возглашает иерей: **Премудрость, прости. И клирицы поют тропарь: Спаси, Господи, люди Твоя: трижды. И тако приходит иерей, нося на главе Честный Крест, пред святыя царския двери ко аналогию, емуже украшену сущу, полагает на нем Честный Крест. И творит поклонение Честному Кресту, трижды, поя тихогласно: Кресту Твоему \* покланяемся, Владыко, \* и святое воскресение Твое славим. И ликове тоже поют велегласно, трижды. Таже целуют Честный Крест и покланяются паки единою.**

**Поюще стихиры самогласны, глас 2:**

**Приидите, вернии,** \* Животворящему Древу поклонимся, \* на немже Христос, Царь славы, волею руце распростер, \* вознесе нас на первое блаженство, \* яже прежде враг сластино украд, \* изгнаны от Бога сотвори. \* Приидите, вернии, Древу поклонимся, \* имже сподобихомся невидимых враг сокрушити главы. \* Приидите, вся отечествия языков, \* Крест Господень песньми почтим: \* радуйся, Кресте,

падшаго Адама совершенное избавление, \* о тебе бо вернейшии царие наши хвалятся, \* яко твоею силою исмаильтеския люди державно покаряюще. \* Тя ныне со страхом христиане целующе, \* на тебе пригвоздившагося Бога славим, глаголюще: \* Господи, на том пригвоздивыйся, помилуй нас, \* яко Благ и Человеколюбец.

**Глас 5:** Зрящи Тя тварь вся, на Кресте нага висяща, \* Содетеля и Зиждителя всех, \* изменяшеся страхом и рыдаше, \* солнце же свет омрачи, \* и земля колебашеся, \* камень же разседашеся, \* и храма светлость раздирашеся, \* мертвии востаха от гробов, \* и ангельския силы ужасошася, глаголюще: \* о, чудесе! Судия судится \* и страждет хотя за спасение мира и обновление.

**Глас 8:** Днесь Владыка твари \* и Господь славы \* на Кресте пригвождается \* и в ребра прободается, \* желчи и оцга вкушает \* сладость Церковная, \* венцем от терния облагается. \* Покрываяй небо облаки \* одеждею облачится поругания, \* и заушается брэнною рукою \* рукою создавый человека; \* по плещема биен бывает \* одевайя небо облаки. \* Заплевания и раны приемлет, \* поношения и заушения \* и вся терпит мене ради, осужденнаго, \* Избавитель мой и Бог, \* да спасет мир от прелести, яко Благоутробен.

**Слава, и ныне, глас тойже:**

Днесь неприкосновенный существом \* прикосновен мне бывает, \* и страждет страсти \* свободаяй мя от страстей; \* свет подаваяй слепым \* от беззаконных устен оплевается \* и дает плещи за плененныя на раны. \* Сего Чистая Дева и Мати на Кресте зрящи, \* болезненно вещаше: \* увы Мне, Чадо Мое, \* что сие сотворил еси? \* Красный добротою паче всех человек, \* бездыханный и беззрачный являешися, \* не имея вида, ниже доброты. \* Увы Мне, Мой Свете, \* не могу спяща зрети Тя, \* утробною уязвляюся, \* и лютое оружие сердце Мое проходит. \* Воспеваю Твоя страсти, \* поклоняюся благоутробию Твоему, \* Долготерпеливе, слава Тебе.

**Посем ектении. Помилуй нас, Боже:**

**И Исполним утреннюю молитву:**

**Диакон: Премудрость. Иерей отпуст, и первый час.**

На 1-м часе тропарь Креста. **Слава: святых. И** ныне: Богородичен часов. По **Отче** наш: **кондак Креста и совершенный отпуст.**

## НА ЛИТУРГИИ:

Блаженны от канона Креста, песнь 3-я, на 4, и святых, песнь 6-я, на 4.

**О**ружие древле жизни блаженное древо даровася хранити за преслушание первозданнаго Адама, Крест же сему путь сотвори.

**О**чима, устнами и душами, лица и сердца поклонимся вси Пресвятому Кресту Жизнодавца Христа, имже мир весь освящается.

**Х**рамы Богу пророчески днесь бывше, покланяющесе древу Пресвятаго Креста, и наследницы Его, со страхом вси того целуем.

**П**еснословим тя, Кресте, верою молящихся силе твоей: изми нас сетей вражиих и управи нас к пристанищу всех спасения, поющих тя.

**Р**изою себе мученическою одеявше, святии, сию труды страдания вашего испестристе.

**Ж**елающе быти со Христом, всеславнии мученицы, течение страдания неуклонным помыслом преидосте.

**С**лава: **З**акон, иже предаде Моисей, храняще, святии, законно пострадаша, посрамльше Антиоха мучителя.

**И ныне: Богородичен: Е**дина словом плотию Слова рождающая, избави, молимся, от сетей врага души наша.

### По входе, тропарь Креста, глас 1:

**С**паси, Господи, люди Твоя \* и благослови достояние Твое, \* победы на сопротивных даруя \* и Твое сохраняя Крестом Твоим жительство.

### Тропарь святых, глас 1:

**Б**олезньми святых, имиже о Тебе пострадаша, \* умолен буди, Господи, \* и вся наша болезни исцели, \* Человеколюбче, молимся.

### Кондак святых, глас 2.

**С**лава: **П**ремудрости Божия столпи седмочисленнии \* и Божественнаго Света светильницы седмосвещнии, \* Маккавеи всемудрии, \* прежде мучеников превелии мученицы, \* с нимиже всех Богу молитесь \* спастися почитающим вас.

### Кондак Креста, глас 4.

**И ныне: В**ознесыйся на Крест волею, \* тезоименитому Твоему новому жительству \* щедроты Твоя даруй, Христе Боже, \* возвесели нас силою Твоею, \* победы дая нам на супостаты, \* пособие имущим Твое оружие мира \* непобедимую победу.

### Трисвятое.

**Прокимен Креста, глас 6:** Спаси, Господи, люди Твоя \* и благослови достояние Твое.

**Стих:** К Тебе, Господи, воззову, Боже мой, да не премолчиши от мене.

**Другий мучеников, глас 4;** Святым, иже суть на земли Его, удиви Господь вся хотения Своя в них.

Апостол Креста, к Коринфяном, зачало 125,

**Б**ратие, слово крестное погибающим убо юродство есть, а спасаемым нам сила Божия есть. Писано бо есть: погублю премудрость премудрых, и разум разумных отвергу. Где премудр? Где книжник? Где совопросник века сего? Не обуи ли Бог премудрость мира сего? Понеже бо в премудрости Божией не разуме мир премудростию Бога, благоизволил Бог буйством проповеди спасти верующих. Понеже и иудее знамения просят, и еллини премудрости ищут: Мы же проповедуем Христа распята, иудеем убо соблазн, еллином же безумие. Самем же званым, иудеем же и еллином, Христа, Божию силу и Божию премудрость.

**Апостол святых, ко Евреем, зачало 330.**

**Б**ратие, святии вси верою победиша царствия, содеяша правду, получиша обетования, заградиша уста львов, угасиша силу огненную, избегоша острия меча, возмогоша от немощи, быша крепцы во бранех, обратиша в бегство полки чужих. Прияша жены от воскресения мертвья своя; инии же избииени быша, не приемше избавления, да лучшее воскресение улучат; друзии же руганием и ранами искушение прияша, еще же и уз и темниц. Камением побииени быша, претрени быша, искушени быша, убийством меча умроша, проидоша в милотех, и в козях кожах, лишени, скорбяще, озлоблени. Ихже не бе достоин весь мир, в пустынях скитающесе, и в горах, и в вертепах, и в пропастьех земных. И сии вси послушествовани бывше верою, не прияша обетования, Богу лучшее что о нас предзревшу, да не без нас совершенство примут. Темже убо и мы, толик имуще облажащ нас облак свидетелей, гордость всяку отложше, и удобь обстоятельный грех, терпением да течем на предлежащий нам подвиг, взирающе на начальника веры и совершителя Иисуса.

**Аллилуия, глас 4: Помяни сонм Твой, егоже стяжал еси исперва.**

**Стих: Бог же Царь наш прежде века содела спасение посреде земли.**

**И святых: Воззваша праведнии, и Господь услыша их и от всех скорбей их избави их.**

**Евангелие Креста, от Иоанна, зачало 60.**

**В**о время оно, совет сотвориша архиереи и старцы на Иисуса, яко да убьют Его. И приведоша Его к Пилату, глаголюще: возми, возми, распни Его. Глагола им Пилат: поимите Его вы и распните. Аз бо не обретаю в Нем вины. Отвещаша ему иудее: мы закон имамы, и по закону нашему должен есть умерети, яко Себе Сына Божия сотвори. Егда же слыша Пилат сие слово, паче убояся. И вниде в претор паки, и глагола Иисусови: откуда еси Ты? Иисус же ответа не даде ему. Глагола же Ему Пилат: мне ли не глаголеши? Не веси ли, яко власть имам распяти Тя, и власть имам пустити Тя? Отвеща Иисус: не имаша власти ни единыя на Мне, аще не бы ти дано свыше. Пилат же слышав сие слово, изведе вон Иисуса, и седе на судищи, на месте глаголемем Лифостротон, еврейски же Гаввафа. Бе же пяток Пасце, час же яко шестый. И глагола Иудеом: се Царь ваш. Они же вопияху: возми, возми, распни Его. Глагола им Пилат: Царя ли вашего распну? Отвещаша архиереи: не имамы царя, токмо кесаря. Тогда же предаде Его им, да распнется. Поемше же Иисуса, и ведоша. И нося крест Свой, изыде в глаголемое Лобное место, еже глаголется еврейски Голгофа. Идеже пропяша Его и с Нем ина два, сюду и сюду, посреде же Иисуса. Написа же и титла Пилат, и положи на кресте. Бе же написано: Иисус Назорянин, Царь Иудейский. Сего же титла мнози чтоша от Иудей, яко близ бе место града,

идеже пропяша Иисуса. И бе написано: еврейски, гречески, римски. Стояху же при кресте Иисусове Мати Его и сестра Матере Его, Мария Клеопова, и Мария Магдалина. Иисус же виде Матерь, и ученика стояща, егоже любляше, глагола Матери Своей: Жено, се сын Твой. Потом же глагола ученику: се Мати твоя. И от того часа поят Ю ученик во своя си. Посем ведый Иисус, яко вся уже совершишася, и приклонь главу, предаде дух. Иудее же, понеже пяток бе, да не останут на кресте телеса в субботу, бе бо велик день тоя субботы, молиша Пилата, да пребиют голени их, и возмут. Приидоша же воины, и первому убо пребиша голени, и другому распятому с Ним. На Иисуса же пришедше, яко видеша Его уже умерша, не пребиша Ему голений. Но един от воин копием ребра Ему прободе, и абие изыде кровь и вода. И видевый свидетелствова, и истинно есть свидетельство его.

### Евангелие святых, от Матфея, зачало 38.

**Рече** Господь Своим учеником: всяк иже исповесть Мя пред человеки, исповем его и Аз пред Отцем Моим, иже на небесех, а иже отвержется Мене пред человеки, отвергуся его и Аз пред Отцем Моим, иже на небесех. Иже любит отца или мать паче Мене, несть Мене достоин, и иже любит сына или дщерь паче Мене, несть Мене достоин, и иже не примет креста своего и вслед Мене грядет, несть Мене достоин. Тогда отвещав Петр рече Ему: се, мы оставихом вся и вслед Тебе идохом, что убо будет нам? Иисус же рече им: аминь глаголю вам, яко вы шедшии по Мне, в пакибытие, егда сядет Сын Человеческий на престоле славы Своея, сядете и вы на двоюнадесяте престолу, судяще обеманадесяте коленама Израилевома. И всяк, иже оставит дом, или братию, или сестры, или отца, или мать, или жену, или чада, или села, имене Моего ради, сторицею примет и живот вечный наследит. Мнози же будут первы последнии, и последни первии.

**Причастен Креста:** Знаменася на нас свет лица Твоего, Господи.

**И святых:** Радуйтесь, праведнии, о Господе, правым подобает похвала.

### Ряд же вычитаем напред или под зачало.

В сий 1-й день августа во обителях и приходских храмах совершают чин священия воды, и бывает сице: приуготовану столу и украшену и воде в чаше, или исходим на источники. И благословившу иерею, глаголется трисвятое и псалом 142: Господи, услыши молитву мою:

Таже, **Бог** Господь: во глас 4.

И тропарь: **К** Богородице прилежно: дважды.

Слава, и ныне: **Не** умолчим никогда, Богородице:

Таже псалом 50: **П**омилуй мя, Боже:

Посем поются тропари священия воды.

Глас 6:

**Е**же радуйся Ангелом приимшая \* и рождающая Зиждителя Твоего, \* Дево, спасай Тя величающая. [Дважды]

**В**оспеваем Сына Твоего, Богородице, \* и вопием: Пречистая Владычице, \* всякия беды избави рабы Твоя.

**Ц**арем, пророком и апостолом \* и мучеником Ты еси похвала \* и Предстательница миру, Всенепорочная.

**Я**зык всяк православных похваляет, и блажит, \* и славит Пречистое Рождество Твое, \* Марие Богоневестная.

**Д**ажь, Христе мой, и мне, недостойному, \* долгов оставление, молюся, \* Тя рождаши молитвами, яко Благоутробен.

**Н**а Тя моя упования возложих, Богородице, \* спаси мя молитвами Твоими \* и даруй ми прегрешений оставление.

**О**живи мя, рождаша Жизнодавца и Спаса, \* спаси молитвами Твоими, \* Благословенная, надеждо душ наших.

**З**иждителя всех во утробе Твоей зачещая, \* Дево Всенепорочная, \* молитвами Твоими спаси души наша.

**Б**огородице, рождаша словом паче слова \* Слово, Всепетая, \* Того моли спасти души наша.

**М**илостива мне Судию же и Сына Твоего, \* прегрешившему паче всякаго человека, \* Твоими молитвами соделай, Владычице.

**П**о долгу воишем Ти: \* радуйся, Богородице, Чистая Приснодево, \* молящися молитвами Твоими спастися.

**И**збави мя огня вечнаго \* и мук, подлежащих мне, Богородительнице, \* яко да ублажаю Тя.

**Н**е презри моления Твоих рабов, \* молимся, Владычице Всепетая, \* яко да избавимся всякаго обстояния.

**Н**едугов, и всяких болезней, \* и бед нас свободи, \* к священному Твоему покрову прибегающих.

**С**транное чудо, еже в Тебе, Богородительнице: \* нас бо ради по нам родися \* всех Зиждитель из Тебе и Бог наш.

**Х**рам Твой, Богородице, \* показася врачевство недугов безмездное \* и оскорбляемых душ утешение.

**П**ресвятая Богородице, рождаша Спаса, \* от бед спаси \* и всякия иныя нужды рабы Твоя.

**И**збави от всякаго прещения, находящаго на рабы Твоя, \* Пресвятая Владычице, \* и всякаго вреда душевнаго же и телеснаго.

**С**паси всех молитвами Твоими, Дево Богородице, \* к Тебе притекающих, \* и избави всякия нужды и скорби.

**К**то, притекаяй в храм Твой, Богородице, \* не приемлет скоро исцеления \* душевнаго, вкупе и телеснаго, Пречистая?

**О**т всех умоляем, Щедре, \* святых и горних чинов, \* очисти мя Рождашею Тя.

**П**ощади, Спасе, души умерших братьий наших \* в надежди жизни \* и ослаби, остави им согрешения.

**Р**адуйся, мира очистилище, Дево, \* радуйся, ручко и свещниче всезлатый \* Божественныя манны и Света, Богоневесто.

**П**оем Тя, Бога, единого в Троице, \* вопиюще глас трисвятый, \* молящеся спасение получитьи.

**Слава:**

**О** Дево, рождающая Спаса \* и Владыку мира и Господа, \* Того моли спасти души наша.

**И ныне:**

**Р**адуйся, горо, \* радуйся, купино, \* радуйся, врата, радуйся, лестнице, \* радуйся, Божественная трапезо, \* радуйся, всех помоще, Владычице. Молитвами, Милостиве, Матере Твоя Пречистыя \* и всех святых Твоих \* Твоя милости людем Твоим даруй. Молитвами славных Архангел и Ангел \* и горних чинов \* рабы Твоя, Спасе, добре сохрани. Молитвами честнаго и славнаго Крестителя Твоего, \* Пророка, Предтечи, \* Христе Спасе мой, рабы Твоя сохрани. Молитвами славных апостолов и мучеников \* и всех святых Твоих \* Твоя милости людем Твоим даруй. Молитвами славных безсребреник, \* Богородице, рабы Твоя сохрани, \* яко еси предстательство мира и утверждение.

**Слава:**

**О**тца и Сына славословим \* и Духа Святаго, глаголюще: \* Троице Святая, спаси души наша.

**И ныне:**

**Н**еизреченно в последняя зачатая \* и рождающая Создателя Твоего, \* Дево, спасай Тя величающия.

**Таже:** Милосердия двери отверзи нам, \* благословенная Богородице, \* надеющийся на Тя, да не погибнем, \* но да избавимся Тобою от бед: \* Ты бо еси спасение рода христианскаго.

**Таже:** Господу помолимся:

**Священник:** Яко Свят еси, Боже наш, и Тебе славу возсылаем, \* Отцу, и Сыну, и Святому Духу, \* ныне, и присно, и во веки веков.

**Лик:** Аминь.

**Таже настоящая тропари, глас 6:**

**Н**ыне наста время, всех освящающее, \* и праведный нас ждет Судия, \* но обратися, душе, к покаянию, \* яко блудница, зовущи со слезами: \* Господи, помилуй мя.

**В**одами одождивый, Христе, источник исцелений, \* во всечестнем храме Девы днесь \* Твоего благословения окроплением \* отгоняеши недуги немощствующих, \* Врачу душ и телес наших.

**Д**ева родила еси Неискусобрачная \* и Дева пребыла еси, Мати Безневестная, \* Богородице Марие, \* Христа Бога нашего моли спаситися нам.

**П**ресвятая Богородице Дево, \* рук наших дела исправи \* и прощение прегрешений наших испроси, \* внегда пети нам ангельское пение:

Святый Боже, \* Святый Крепкий, \* Святый безсмертный, \* помилуй нас. [Трижды]

И по трисвятом диакон глаголет: **Вонмем.**

Священник: **Мир** всем.

Лик: **И** духови твоему.

Чтец: **Прокимен, глас 3: Господь просвещение мое \* и Спаситель мой, кого убоюся?**

Стих: **Господь Защититель живота моего, от кого утрашуся?**

**Апостол ко Евреем, зачало 306.**

**Братие,** \* Святей и освящаемии от Единого вси, \* еже ради вины не стыдится братию нарицати их, глаголя: \* возведу имя Твое братии Моей, посреде Церкви воспою Тя. \* И паки: \* Аз буду надеяся Нань. \* И паки: се Аз и дети, яже Ми дал есть Бог. \* Понеже убо дети приобщися плоти и крови, \* и Той приискренне приобщися техже, \* да смертию упразднит имущаго державу смерти, сиречь диавола. \* И избавит сих, елицы страхом смерти чрез все житие повинни беша работе. \* Не от Ангел убо когда приемлет, но от семени Авраамова приемлет. \* Отнюдуже должен бе по всему подобитися братии, \* да милостив будет и верен Первосвященник, яже к Богу, \* во еже очистити грехи людския. \* В немже бо пострада, Сам искушен быв, \* может искушаемым помощи.

Священник: **Мир** ти.

**Аллилуя, глас 6. Стих 1: Отрыгну сердце мое слово благо.**

**Стих 2: Глаголю аз дела моя царви.**

**Евангелие от Иоанна, зачало 14:**

**Во** время оно, \* взыде Иисус во Иерусалим. \* Есть же во Иерусалимех на овчей купели, \* яже глаголется еврейски Вифесда, \* пять притвор имущи. \* В тех слезаше множество болящих, \* слепых, хромых, сухих, чающих движения воды. \* Ангел бо Господень на всяко лето схождаше в купель \* и возмущаше воду, \* и иже первее влазаше по возмущении воды, здрав бываше, \* яцем же недугом одержим бываше.

**Таже диакон ектению:**

**Миром** Господу помолимся.

**О** свышнем мире и спасении душ наших Господу помолимся.

**О** мире всего мира, благостоянии святых Божиих Церквей и соединении всех Господу помолимся.

**О** святем храме сем и с верою, благоговением и страхом Божиим входящих вонь Господу помолимся.

**О** Великом Господине и Отце нашем, господине нашем Преосвященнейшем митрополите (или архиепископе, или епископе) (имя рек), честнем пресвитерстве, во Христе диаконстве и о всем причте и людех Господу помолимся.

**О** Богохранимей стране нашей, властех и воинстве ея Господу помолимся.

**О** граде сем (или о веси сей, или о святей обители сей), всяком граде, стране и верою живущих в них Господу помолимся.

**О** благорастворении воздухов, о изобилии плодов земных и временех мирных Господу помолимся.

**О** плавающих, путешествующих, недугующих, страждущих, плененных и о спасении их Господу помолимся.

**О** еже освятитися водам сим силою, и действием, и наитием Святаго Духа Господу помолимся.

**О** еже снизходити на воды сия очистительному Пресущныя Троицы действу Господу помолимся.

**О** еже быти воде сей целительной душ и телес и всякия сопротивныя силы отгнательной Господу помолимся.

**О** еже низпослати Господу Богу благословение Иорданово и освятити воды сия Господу помолимся.

**О** всех требующих от Бога помощи и заступления Господу помолимся.

**О** еже просветитися нам просвещением разума, Единосущною Троицею, Господу помолимся.

**Я**ко да Господь Бог наш покажет ны сыны и наследники Царствия Своего воды сея причащением же и кроплением, Господу помолимся.

**О** избавитися нам от всякия скорби, гнева и нужды Господу помолимся.

**З**аступи, спаси, помилуй и сохрани нас, Боже, Твоею благодатию.

**Пр**есвятую, Пречистую, Преблагословенную, Славную Владычицу нашу Богородицу и Приснодеву Марию со всеми святыми помянувши, сами себе, и друг друга, и весь живот наш Христу Богу предадим.

**Лик:** Тебе, Господи.

**Возглас:** Яко подобает Тебе всякая слава, честь и поклонение, Отцу, и Сыну, и Святому Духу, ныне, и присно, и во веки веков.

**Лик:** Аминь.

#### **Таже молитву сию:**

**Г**осподи Боже наш, Великий в совете и дивный в делах, всяя твари Содетелю, храняй завет Твой и милость Твою любящим Тя и соблюдающим повеления Твоя, всех в нуждах умиленных приемляй слезы, сего бо ради пришел еси в рабии зраце, не привидении нас устрашая, но здравие телу истинное подаваяй и глаголяй: се здоров был еси, ктому не согрешай, но и от брения здоровы очи соделал еси и, умыться повелев, свету вселитися сотворил еси словом. Супротивных страстей волны смущаяй, и жития сего сланое море изсушаяй, и тяжелоносныя сластей укрощаяй волны, Сам, Человеколюбче Царю, давай нам снегосветлою одетися одеждою, от воды же и Духа, и причастием же воды сея, и окроплением Твое благословение нам низпосли, скверну страстей омывающее. Ей, молимся, посети нашу, Блаже, немощь и исцели наша недуги душевныя же и телесныя, милостию Твоею, молитвами Всепречистыя, Преблагословенныя Владычицы нашея Богородицы и Приснодевы Марии, силою Честнаго и Животворящаго Креста, предстательства честных Небесных сил безплотных, честнаго славнаго Пророка, Предтечи и Крестителя Иоанна, святых славных и всехвальных апостол, преподобных и Богоносных отец наших, иже во святых отец наших, великих иерархов и вселенских учителей, Василия Великаго, Григория Богослова и Иоанна Златоустаго; иже во святых отец наших, Афанасия и Кирилла, Патриархов Александрийских; иже во святых отца нашего Спиридона, Тримифунтскаго чудотворца; иже во святых отца нашего

Николая, архиепископа Мирликийскаго, чудотворца; иже во святых отец наших, Мефодия и Кирилла, учителей Словенских; святаго равноапостольнаго великаго князя Владимира и святых равноапостольных великия княгини Ольги; иже во святых отец наших, всяя России чудотворцев, Петра, Алексия, Ионы, Филиппа, Ермогена и Иннокентия; святаго и славнаго великомученика Георгия Победоносца; святаго и славнаго великомученика Димитрия Мироточиваго; святых и добропобедных мучеников; преподобных и богоносных отец наших; святых и праведных Богоотец Иоакима и Анны; святых славных чудотворцев и безсребреников Космы и Дамиана, Кира и Иоанна, Пантелеимона и Ермолая, Сампсона и Диомида, Мокія и Аникиты, Фалалея и Трифона, святых седми мученик Маккавей, Авима, Антонина, Гурия, Елеазара, Евсевона, Алима и Маркелла, и матере их святых Соломонии, и учителя их святаго мученика Елеазара, ихже и память совершаем, и всех святых Твоих.

**С**паси, Господи, и помилуй Господина нашего преосвященнейшаго епископа (**имя рек, егоже есть область**), даруй ему душевное и телесное здравие и работному Тебе сему христианскому жительству во всем милостив буди. Помяни, Господи, всякое епископство православных, право правящих слово Твоя истины, и весь священнический и монашеский чин, и спасение их. Помяни, Господи, ненавидящих и любящих нас, служащих братьий наших, предстоящих и благословною виною отшедших и заповедавших нам, недостойным, молитися о них. Помяни, Господи, в пленении и скорбех сущих братьий наших и помилуй их по велицей милости Твоей, всякия нужды избавляя, яко Ты еси Источник исцелений, Христе Боже наш, и Тебе славу возсылаем со Безначальным Твоим Отцем и с Пресвятым, и Благим, и Животворящим Твоим Духом, ныне, и присно, и во веки веков.

**Лик: А**минь.

**Священник: М**ир всем.

**Лик: И** духови твоему.

**Диакон: Г**лавы вапа Господеви приклоните.

**Лик: Т**ебе, Господи.

**Священник же молитву тайно:**

**П**риклони, Господи, ухо Твое и услыши ны, Иже во Иордане креститися изволивый и освятивый воды, благослови всех нас, иже приклонением своєю выи назнаменующих работное воображение, и сподоби нас исполнитися освящения Твоего причащением воды сея, и да будет нам, Господи, во здравие души и тела.

**Возглас: Т**ы бо еси освящение наше, и Тебе славу, и благодарение, и поклонение возсылаем со Безначальным Твоим Отцем, и Пресвятым, и Благим, и Животворящим Твоим Духом, ныне, и присно, и во веки веков.

**Лик: А**минь.

**Таже, взем Честный Крест, благословляет воды трижды, крестообразно низводя и возводя и право и поя настоящий тропарь, глас 1:**

**С**паси, Господи, люди Твоя \* и благослови достояние Твое, \* победы на сопротивныя даруя \* и Твое сохраняя Крестом Твоим жительство. *(Грижды)*

**И посем поют тропарь сей, глас 2:**

**Т**воих даров достойны нас сотвори, Богородице Дево, \* презирающи согрешения наша \* и подающи исцеления \* верою приемлющим благословение Твое, Пречистая.

**Таже целует иерей Честный Крест, такожде и вси людие, и кропит всех священной водою, алтарь же и Церковь всю; людие же поют настоящий тропарь, глас 4:**

**И**сточник исцелений имуще, святии безсребреницы, \* исцеления подаваете всем требующим, \* яко превелиих дарований сподобльшиися \* от приснотекущаго Источника, Спаса нашего. \* Глаголет бо к вам Господь, \* яко единоревнителем апостольским: \* се дах вам власть на духи нечистыя, \* якоже тех изгонити, \* и целити всякий недуг и всякую язю. \* Темже в повелениях Его добре жительствовавшие, \* туне приясте, \* туне подаваете, \* исцеляюще страсти душ и телес наших.

**П**ризри на моления Твоих раб, Всенепорочная, \* утоляющи лютая на ны востания, \* всякия скорби нас изменяющи, \* Тя бо едину твердое и известное утверждение имамы \* и Твое предстательство стяжахом, \* да не постыдимся, Владычице, Тя призывающи. \* Потщися на умоление Тебе верно вопиющих: \* радуйся, Владычице, всех помощи, радости и покрове \* и спасение душ наших.

**В**ладычице, прими молитвы раб Твоих \* и избави нас от всякия нужды и печали.

**По кроплении же ектения:**

**П**омилуй нас, Боже, по велицей милости Твоей, молимся, услыши и помилуй.

**Лик: Господи, помилуй. [Грижды]**

**Е**ще молимся о еже сохранитися святей обители сей, и всякому граду, и стране от глада, губительства, труса, потопа, огня, меча, нашествия иноплеменников и междоусобных брани; о еже Милостиву и Благоуветливу быти Благому и Человеколюбивому Богу нашему, отвратити всякий гнев, на ны движимый, и избавити ны от належащаго и праведнаго Своего прещения, и помиловати ны.

**Лик: Господи, помилуй, 40.**

**Иерей: У**слыши ны, Боже, Спасителю наш, упование всех концев земли и сущих в мори далече, и Милостив, Милостив буди, Владыко, о гресех наших, и помилуй ны. Милостив бо и Человеколюбец Бог еси, и Тебе славу возсылаем, Отцу, и Сыну, и Святому Духу, ныне, и присно, и во веки веков.

**Лик: А**минь.

**Иерей: М**ир всем.

**Лик: И** духови твоему.

**Диакон: Г**лавы ваша Господеви приклоните.

**Лик: Т**ебе, Господи.

**Иерей же глаголет молитву велегласно:**

**В**ладыко Многомилостиве, Господи Иисусе Христе, Боже наш, молитвами Всепречистыя Владычицы нашея Богородицы и Приснодевы Марии, силою Честнаго и Животворящаго Креста, предстательства честных Небесных сил безплотных, честнаго славнаго Пророка, Предтечи и Крестителя Иоанна, святых

славных и добропобедных мученик, преподобных и богоносных отец наших иже во святых отец наших и вселенских великих учителей и святителей, Василия Великаго, Григория Богослова и Иоанна Златоустаго; иже во святых отца нашего Николая, архиепископа Мирликийскаго, иже во святых отец наших Мефодия и Кирилла, учителей Словенских; святаго равноапостольнаго великаго князя Владимира и святых равноапостольных великих княгини Ольги; иже во святых отец наших, всея России чудотворцев, Петра, Алексия, Ионы, Филиппа, Ермогена и Иннокентия; святых и праведных Богоотец Иоакима и Анны; святых семи мученик Маккавей, Авима, Антонина, Гурия, Елеазара, Евсевона, Алима и Маркелла, и матере их святых Соломонии, и учителя их святаго мученика Елеазара, и всех святых Твоих, благоприятну сотвори молитву нашу, даруй нам оставление прегрешений наших, покрый нас кровом крилу Твоею, отжени от нас всякаго врага и супостата, умири нашу жизнь, Господи, помилуй нас и мир Твой и спаси души наша, яко Благ и Человеколюбец.

Лик: Аминь.

И отпуст.

### Молитва на благословение новаго меда.

Необыкновенный в милости и неизреченный во щедротах, Господи Иисусе Христе, дивен Сый во славе и творяй чудеса. Ты, действием Святаго Духа иногда благословивый Израиля и его медом насытивый от камене, Сам и ныне призри свыше на создание Твое сие, и благословением Твоим Небесным Благослови и освяти соты пчел и от них мед, и подаждь ему действенну благодать, паче всех совершенну, да всяк от него вкушающий, приемлющий и ядущий обрящет благополучное здравие, и пищею сею насытится, и исполнится всякаго блага. Яко Ты еси подаваяй всяческая благая и Тебе славу возсылаем со Безначальным Твоим Отцем и Пресвятым и Благим и Животворящим Твоим Духом, ныне, и присно, и во веки веков. Аминь.

### И кропит священной водою.

\* \* \*

А идеже чин освящения воды совершается на утрени, поем сице: По славословии, и по трисвятом, и по тропаре: Спаси, Господи, люди Твоя: поются тропари: Еже радуйся: и прочее порядку священие воды, яко обычай. По освящении же воды и по тропарех: Источник исцелений: и Призри на моления: и Владычице, прими: творим и поклонение Честному Кресту, яко предписася.

На часех: тропарь Креста. Слава: святых. И ныне: Богородичен часов. По трисвятом, кондаки премеяем.

На Литургии: Блаженны от канона Креста, песнь 3-я, на 4, и святых, песнь 6-я, на 4. По входе тропарь Креста и мучеников. Слава: кондак мучеников. И ныне: Креста. Трисвятое. Прокимен Креста, глас 6: Спаси, Господи, люди Твоя \* и благослови достояние Твое. Стих: К Тебе, Господи, воззову, Боже мой, да не премолчиши от мене. Другий мучеников, глас 4; Святых, иже суть на земли Его, удиви Господь вся хотения Своя в них. Апостол Креста, к Коринфяном, зачало 125, и святых, ко Евреем, зачало 330. Аллилуия, глас 4: Помяни сонм Твой, егоже стяжал еси исперва. Стих: Бог же Царь наш прежде века содела спасение посреде земли. И

**святых:** Воззваша праведнии, и Господь услыша их и от всех скорбей их избави их. Евангелие Креста, от Иоанна, зачало 60. И святых, от Матфея, зачало 38. **Причастен Креста:** Знаменася на нас свет лица Твоего, Господи. И **святых:** Радуйтесь, праведнии, о Господе, правым подобает похвала. **Ряд же вычитаем напред или под зачало.**

\* \* \*

Аще же 1-й день августа случится в Неделю.

В субботу вечера, на малой вечерни, стихиры воскресны и Богородицы, по обычаю.

На велицей вечерни, по кафизме, на **Господи**, возвах: стихиры воскресны, 3, и Анатолиев, 1, и Креста, 3, и мучеников, 3. **Слава:** Креста. **И ныне:** Богородичен 1-й, гласа.

На литии, стихира храма и мучеников хвалитныя. **Слава:** мучеников. **И ныне:** Богородичен.

На стиховне Октоиха воскресны. **Слава:** мучеников. **И ныне:** Креста.

На благословении хлебов, тропарь: **Богородице**, Дево: дважды, и Креста, единожды. **Таже:** **Буди Имя Господне:** и прочее.